



ZABILJEŽENO SIPA pretresla objekte Pavlović banke IZUZETA DOKUMENTACIJA O DODIKOVOM KREDITU

**Nakon što je advokat Tomić ustvrdio kako posjeduje papire
o izdavanju vile na Dedinju Ambasadi Izraela, ministar
Mektić ističe kako papira ima pun kofer**

Po nalogu tužioca iz Posebnog odjela za organizovani kriminal, privredni kriminal i korupciju, a uz naredbu Suda BiH, policijski službenici Državne agencije za istrage i zaštitu (SIPA) jučer su od ranih jutarnjih sati pretresali prostorije i dokumentaciju Pavlović International banke u Bijeljini.

Pet lokacija

“Na terenu se nalaze istražitelj i osoblje Tužiteljstva BiH, koji koordiniraju rad policijskih djelatnika u potrazi za dokumentacijom. Pretresi dokumentacije vrše se u okviru istrage koju vodi Tužiteljstvo BiH, a u svezi s kaznenim djelima finansijskog kriminala. Nakon pretresa, određena dokumentacija bit će oduzeta u svrhu dokaznog materijala. Ne možemo dati više informacija za javnost”, naveli su iz Tužilaštva, no, iz SIPA su kazali kako su pretresi obavljani i u filijalama banke u Banjaluci i Doboju.

“Pretresi se vrše s ciljem pronalazjenja i privremenog oduzimanja dokumentacije i drugih predmeta koji mogu poslužiti kao dokaz za izvršenje krivičnog djela iz člana 209. stav (3) KZBiH - Pranje novca. Pretresaju se prostorije Pavlović International banke u Bijeljini i njenim filijalama u Banjaluci i Doboju i na još dvije lokacije na području Bijeljine. Po realizaciji predmetnih naredbi, SIPA će Sudu i Tužilaštvu BiH dostaviti odgovarajuće izvještaje o poduzetim aktivnostima”, istakli su iz SIPA.

Podsjećamo, vlasnik Pavlović banke Slobodan Pavlović nedavno je došao u Sarajevo, te dao iskaz glavnom tužiocu BiH Goranu Salihoviću u vezi sa kupovinom vile predsjednika RS-a i SNSD-a Milorada Dodika na beogradskom Dedinju. On i njegov advokat Duško Tomić medijima su kazali kako je dati iskaz vezan za Dodikov kredit u Pavlović banci od 750.000 eura, kojim je, navodno, kupio vilu u Ulici Vaska Pope 16, u Beogradu.

Osim Dodika, iz SDS-a su u ovom slučaju krivične prijave podnijeli i protiv Slobodana Pavlovića, zatim Radomira Jovanovića, direktora banke, Petra Lazovića, bivšeg direktora, Slobomira Blaga Blagojevića i članova NO Pavlović banke Mile Pavlović i Milovana Erića, kao i direktorice Agencije za bankarstvo RS-a Slavice Injac. Advokat Tomić jučer nam je kazao kako je “malo čudno da se ulazi u banku ako istrage nema”. Na naše pitanje da li će Slobodan Pavlović biti jedini svjedok u cijeloj priči o vili na Dedinju, odgovorio je: “Ko kaže da je jedini? Ostali šute, ali vidjećemo dokad.”

Kolege sa BNTV i N1 obilazile su lokaciju na Dedinju, ali u vili nikoga nisu zatekle, dok je Tomić za Oslobođenje ustvrdio kako objekat koristi Ambasada Izraela u Srbiji i još neke organizacije iz te zemlje, te da za to posjeduje sve papire.

- Papira ima pun kofer. Papir trpi sve, a faktičko stanje je nešto drugo. Razumijem u cijeloj priči i Gorana Salihovića, jer se u interesu istrage podaci ne mogu odavati, kazao nam je jučer ministar sigurnosti BiH Dragan Mektić.

Kada smo pozvali Ambasadu Izraela, rečeno nam je kako “sigurno zovemo zbog rezidencije ambasadora, te kako nikakve službene informacije o tome ne mogu davati u javnost”.

Dodatne informacije

Direktorica Pavlović banke u Bijeljini Ružica Janković jučer je za Srnu potvrdila da su inspektori SIPA tražili informacije u vezi sa istragom o kreditu Dodika.

- Predmet njihove posjete isti je kao i prethodni put, s tim da su ovaj put tražili nešto više dodatnih informacija i banka je na raspolaganju da im to omogući, rekla je Jankovićeva, dodavši kako su inspektori profesionalno uradili svoj posao “i mi smo na isti način udovoljili zahtjevima”.

J. M.

